



Russia-i Ukraine ken o US den Saudi Arabia nung jembitsü

Williamson Middlesex nung denogo



Nagatsür rongnung mezüing High court nung obendanger (Additional Judge) adütsü atema tanü Lady Judge. Smti.Yarenjungla Longkumer tenangzükba agiogo. (Feb. 17,2025).

CM Neiphiu Rio-i kaketkeno tashi indang jembir

Dimapur, February 17, 2025 (TYO): Kaketkeno ajanga loktiliba yanglushir, telemsa aliba agiener aser temelenshi akasodaktsür ta Chief Minister Neiphiu Rio-i ashi.

Chümoukedima nung The White Owl Literature Festival and Book Fair lapoktsüba sentong nung pai kaketkeno tashi amshitsü ayongzük.

"Iba benjung ya shisashirtem sentepba dang masü saka otsütem, tangatetbatem aser sobalibatem lemsatepba benjung ka lir" ta Rio-i ashi.

"Nenoki züluba ojang shia agi tesüiba aser tarutsü sendakteper. Nenoki nür lokti sobaliba aser maitsü wazüka ayur. Iba benjung nung nisung temeyoktep adenba atema kanga pelar" ta paisa ashi.

Northeast tenentem aser India tiyongtsü, anüolen tziüküntem nungi anüdoklen lisem lima tem nungi nisung tapu balala iba benjung nung adentsü arua lir" ta paisa shisem.

"Iba sabang nung linük

ajungalen nung olatem dendaktsüba atema tenüingsang agütsür. Iba ajanga telongjem aser tangatettep adokdaktsür. Nagaland ya Land of Festivals lir aser iba tesem nung The White Owl Literature Festival and Book Fair amongba ajanga sobaliba dang masü saka kaketkeno benjunger" ta paisa metetdaktsü.

"Kaketkeno ajanga loktiliba melenshidaktsür, telemsa adoka aliba agiener aser temelenshi bener arur. Asenoki iba tashi ya akhümtsübuttsüla aser shisa kaa amshitsü aser tarutsü pututem maneni ajungmesotsüla" ta Rio-isa ashi.

"Naga loktiliba ya lanur loktiliba ka lir aser kaket shisatsü ya onok dangi küm 150 tejakdang ang aru. Penguins Library ajanga moaja aser yaria kaketnang ka amenokba ajanga tila ka tenzüker. Iba kaketnang ya Nagaland nung alirtem aser talisa lanurtem o kaketshirtem atema temoatsü ka lir" ta paisa ashi.

Biren-i Manipur nung telemsa adokdaktsü; Meira Paibi temi Rs 500 yong lungkak ait

Imphal, February 17, 2025 (Agencies): Taoba Bharatiya Janata Yuva Morcha (BJYM) President, M. Barish Sharma-i Facebook post ka nung N. Biren Singh aser Meira Paibi nung onük kar züluba atema Hombarnü tetsürtemi parki kakkoka yur pa dang tatok meshitsü takhangba agütsü.

Meira Paibi nungeri lungkak aйдang nisung shia nem Rs 500 agütsü ta Barish Sharma-i ashi.

"Pai iba osang prokshiba atema onok aoksar aser jashir. Manipur nung mangatettep adoka aliba mapang tetsürtemi tensa tajungba akümtsü meranga arur saka pai onok tenüing menükttsüogo. Pai tatok meshitsüla" ta lungkak aiter tetsür kati ashi.

February 12, 2025 nü Barish Sharma-i Facebook nung iba post asüba ya Manipur nung

tetsürtem anema inyakba mapa ka ama züngshir.

Tanü Barish Sharma par kidang nungi kimai aluba sülen Meira Paibi telok den raratep. Pai tetsürtem den mit nung jembir.

Barish Sharma-isa Chief Minister N. Biren Singh dak tai tonglokttsüogo.

"Manipur nung mepetmesü adoka aliba ya Biren ajanga lir. Biren-i kü taküm agitsü aiben merangogo aser Biren-i tuyuba mapa aika ni inyakogo" ta Sharma-i ashi.

"Ni kechisa meteta lir ashitsü. Biren-i ni kwiben tepsettsü merang? Village defenders apur mezngebubaji ni liasü. Biren-i ashiba ajaklen onok ao. Nai ni tepsetnura arung saka ni ochi jembitsü. Biren-i Manipur nung telemsa adokdaktsü" ta Barish Sharma-i video ka nung ashi.

Arunachal nung Khristantemi APFRA anema lumia lungkak ait

Itanagar, February 17, 2025 (Agencies): Arunachal Christian Forum (ACF)-i Itanagar nung ghonda 8 lumia lungkak aittsü ayongzükba ajanga Arunachal Pradesh nung tensa mejungi akümtsüsa tia ka ajurua lir.

ACF-i ayongzükba sentong nung MLA tem dena nisung meyrjang aika aden.

State sorkari Arunachal Pradesh Freedom of Religion Act (APFRA), 1978 mapa tenzükttsü lemtetba anema ACF-i iba sentong ayonga agiogo.

"APFRA ajanga sensotem tamangba yimsü temeten dak kongshir. Onoki iba Act magizüker. India kübok state 11 nung anti-conversion laws tenzüka lir aser iba ozüing ya Khristan yimsü dak tenük yoka yangluba lir" ta ACF president

Tarh Miri-i ashi.

"APFRA mapa tenzükbajanga nübortem tsüingda telemsa adoktsü aser temulung melemteptsü. Tamangba yimsü melentsüba ya pei mulung lir. Indian Constitution-i tashiyim agi tamangba yimsü melenba noktanger. Onoki forced conversion anema ken o benokba ka danga mengudang. Onoki iba Act agentsü akhangar" ta ACF Secretary-General James Techi Tara-ia metetdaktsü.

Gauhati High Court-i tetuyuba agütsüba ama iba Act ya mapa kuma tenzükttsü ta Arunachal Pradesh sorkari ashir.

GHC-i state sorkar dang September 2024 nungi tenzüka ita trok tsüingda draft rules renemtsü tetuyuba agüja liasü.

"High Court-i lisopur tamangba yimsütem kümzüka ayutsü tuyuba ama rules yanglur. Iba onük atema Indigenous affairs minister aser home minister nati sendaktepa alirtem den jembitsü" ta Chief Minister Pema Khandu-i ashi.

Ajisüaka, ACF-i CM Khandu aitsür aser pai o ana jembir ta ashir. "2018 nung Chief Minister Khandu-i APFRA agentsü ta nangzüka liasü saka 2024 nungbo pai iba Act mapa kuma inyakttsü pusemer" ta Miri-i ashi.

Arunachal Pradesh nung Khristantemi APFRA anema lungkak aitba ajanga tamangba yimsü nüjiso, lisopurtem temetentem aser sorkari tamangba yimsü melenba inyakyim ketdangsüba atema o atsütep tulu ka tenzüko.

'Agreed Position' aser 'Framework Agreement' medemdangtsü makok: WC NNPGs

Dimapur, February 17, 2025 (TYO): NSCN (IM)-i 'Agreed Position' aser 'Framework Agreement' medemdanga jembiba atema N Kitovi Zhimomi-i aniba Working Committee, Naga National Political Groups (WC-NNPGs)-i aitsüogo.

"NSCN (IM) aser India sorkar tsüingda sign sütepba Framework Agreement (FA) nung Indo-Naga yimten mangatettep ya küm 60 shi tain lir ta shia tenzüka lir aser iba ajanga 1955 matongdang taküm bendanga agütsür Naga nungeri meyrjang aika ashiokttsür" ta WC-NNPGs-i sangdong ka nung ashi.

"Framework Agreement nung 1951 'Plebiscite' amadok. Ano, iba agreement sign masüadang küm 67 tejakdang Naga nungeri August 14, 1947 nü nüjiso anguba sangoktsüba amadok. Maneni, 1929 nung Naga nungeri Simon Commission nem memorandum ka agütsüba parnoki amadok aser iba ya Naga nungeri ashiokttsüba agreement ka lir" ta WC-NNPGs-isa metetdaktsü.

NSCN (IM)-i Framework Agreement nung Indian system kanga tasak asüba angateta lir aser iba atema tenüingsang

agütsür ta shia lir. Iba ajanga NSCN (IM)-i taoba nung takhangba agütsübaji tamakoktsü ta angatetba sayur, ta WC-NNPG-isa ashi.

Ajisüaka, tangbo NSCN (IM)-i Framework Agreement nung medensemba tatalokbatem indang jembir. Parnoki flag, constitution, integration enoktsü amadok aser 'shared sovereignty' o 'contemporary reality' indang ang jembir ta parnokisa ashi.

"Yimtenren olemtep ka nung shared sovereignty indang jembitsü nüingdak madoker. Parnoki India den olemtep takok ngua tembangtsü atema kanga aritepa inyak aser iba ajanga Naga nungeri yimten temetentem yoka achi" ta WC-NNPG-isa metetdaktsü.

NSCN (IM)-i Framework Agreement sign sütepba sülen parnoki amadokba mesüra memeteti aliba onüktem bener arutsü meranger. 'Framework Agreement' aser 'Agreed Position' na medemdangtsü nüingdak madoker kechiyong 'Agreed Position' ya tejanga lir. Iba nung miim onüktem mesüra masüba ken o tem dena mali aser India sorkari Naga nungeri tarutsü tia yangertsü temeten agizüka lir. 'Agreed Position' nung tanü

tensa den apet Indo-Naga yimten tebilemtsü koktetsü bangjemtepa lir ta WC-NNPGs-isa metetdaktsüogo.

"NSCN (IM)-i Naga movement aser Naga nungeri putiotsü kecha memetet. Asenoki par tanishirtem talisa Manipur nungi Naga nungeri dak tai tonglokttsütsü nüingdak madoker kechiyong parnoki Naga Hills (tanü Nagaland state) nung atalokba otsü aika memetet" ta parnokisa ashi.

NSCN (IM)-i Naga political movement indang tongti putiotsütem amadokogo. Parnoki 'Plebiscite' amadokogo kechiyong Manipur nung Naga kintemi iba nung shilem magi. Anungji kidanger state tem nungi Naga nungeri Nagaland nung Naga nungeri tebilemtsütem nung tebang maitsüla ta WC-NNPGs-isa ashi.

"Framework Agreement ya Agreed Position sign masüadang sign asüba lir. Framework Agreement nung freedom, independent sovereignty, aser Naga-inhabited areas ka akümtsüba indang benoka mali aser item onük ajak Framework Agreement ajanga ali nung remogo" ta WC-NNPGs-isa metetdaktsüogo.



MLA aser Committee on Government Assurances Chairman Kuzholuzo Nienu-i Hombarnü Multi-Disciplinary Sports Complex Dimapur semdangdang agiba noksa ka angur. Dimapur nung iba Complex merenemtetba ya senotsü peria manguba ajanga lir aser Committee-i state sorkar dang iba mapatong tekaratiba nung renemtsü atema report ka agütsütsü ta tanü MLA Nienu-i ashi. 2006 küm nungi Department of Youth Resources and Sports-i Dimapur nung Multi-Disciplinary Sports Complex yanglutsü tenzüka liasü. (Dimapur, February 17)

PDLA ajanga legal awareness sentong ayongzük



Phek District Legal Services Authority (PDLA) ajanga Phek Village Panchayat Hall nung February 14, 2025 nü legal awareness sentong ayongzuka alidang tangokba noksa angur.

Kohima, Tsüklai/February 17 (TYO): Phek District Legal Services Authority (PDLA) ajanga Phek Village Panchayat Hall nung February 14, 2025 nü legal awareness sentong ka ayongzuka liasü ta menur aruba osang ka ajanga ashi.

Iba sentong nung Khotsozo Venuh, PLV, Phek DLSA menden liasü aser Chivozo Soho, chairman, Phek Village Council ajanga pela agizükba o jembi.

Vethothi Vero, Retainer Lawyer ajanga "Basic procedure of law, FIR, and bail in India" onük nung ajemdaker jembidang, criminal case ka nung First Information

Report (FIR) ya mezüngbuba mera lir ta ashi.

FIR ya mapa tamajung inyadkak nungi anasatiba police station nung agütsüsula aser yangji FIR benoker tenüng, address amala tejangja, aibelenba tejangja (anogo, mapang, tesem aser yimya), tai tongloksür tenüng (meteta lira), aser tenük kuli lira itemji agütsüsula, ta ashi.

Bail ya ozüng tsütsü inyakyim ka lir aser iba ya ajanga ken o jembitsü ataa police kabu nung alir chioksü melar, ta pai ashi.

Sekhotso Rokha, Panel Lawyer, Phek DLSA ajanga 'Rights of an Arrested Person in India' onük jembia liasü.

Pua alir ka timi anepalutsü asoshi Indian Constitution aser ozüng balala ajanga temeden aika agüja lir, ta pai ashi.

Pua aliri pei mulungba nung lawyer shima pa/la asoshi nokdaksü temeden lir, ta ashi.

Right Against Illegal Detention indang jembidang, magistrate nungi temelaba makai nisung ka ghonda 24 dak tema pua ayutsü memelar, ta Rokha-i ashi.

Aibelen tesashi atema magistrate ajanga police ket nung anogo 15 tashi ayutsü melar.

Pua alirtem shidak nung tekeratiba nung aser yimjak nung ken o jembitsü temeden lir, ta paisa ashi.

Manipur Chief Secretary-i Churachandpur nung tensa asadang

Churachandpur, Tsüklai/February 17 (Agencies): Manipur indang Chief Secretary Prashant Kumar Singh (PK Singh), IAS ajanga Hombarnü Churachandpur district nung tensa asadanga liasü, kong Kuki National Army (KNA) telok nungi nisung tenet den prangbong aser injang pua liasü.

Indian Army aser 3 Corps Spears kübok Assam Rifles temi February 14, 2025 nü KNA züngsem tenet ya hadir bener parnok indang designated camps alema adoka senzua aliba yong apu.

February 13 nü Manipur nung President's Rule benoker tang mezüngbuba pai

Churachandpur semdangba mapang tensa asadanga telungpur temi nübur anema mapa tamajung inyaka nüburtem timtemba jembitsü asoshi security ketdangsürtem ajurua liasü.

Chief Secretary meina Manipur Director General of Police, Rajiv Singh, IPS, aser NK Ujjwal, IPS, IGP oa liasü.

Central sorkar den Kuki-Zo telungpur telok 25 tashi yimjung ken o jembiba (Suspension of Operation) kübok lir.

Iba tezüngzüktep kübok parnok ya hadir bener parnok indang designated camps alema madoktsü shia lir.

Iba sülen Chief Secretary-i Churachandpur district kübok

Tuibong tesema semdanga yangji nüburtem takum tia asadanga district indang civic administration inyakyim reprangshima liasü.

Pa Mini Secretariat, Tuibong nung aliba Conference Hall nung Deputy Commissioner, Dharun Kumas S, IAS aser District Administration ajanga agizuka liasü.

Iba mapang pai Churachandpur aser Pherzawl district tem nungi Civil Society Organisations (CSOs) lenirtem den sensaksema liasü.

Chief Secretary-isa pei ki yutsür tesem balala nung jenoka aliba Civil Officers aser Medical students tem ajurua sensaksema liasü.



Anogo asembuba 'Watershed Yatra Mokokchung District' sentong Anakiyimsen yimdak akadang tetushi tejaoker, Nükshimatong NCS, SDO (Civil) & Border Magistrate, Tuli, Mokokchung den Jentiren Jamir, Femmina Miss India Nagaland 2024, DPO, Land Resources Department, Sentinungla aser shilem agirtem külemi noksa nung angur. Mokokchung, February 17, 2025




OFFICE OF THE
AO SENDEN
"Nübur Asoshi" (For the People)


Ref. No. Date : 17/02/2025

PRESS RELEASE

Ao Senden-i ayonga Moatsü Mini Hornbill Benjung 2025 May 1-3, 2025 anogotem nung amungtsü lemtet lir. Anungji May 1-2, 2025 anogotem nung Ao Senden sentong den tsükteptsüsa Aor yimtem aser jila kecha nunga sentong meyanglutsü sangdonger.



Marsanen Imsong.
Tir.



Imtipokym.
Tongti Zulur.

Sübosolemtsü ayokdak ka lapok



Mokokchung nung "SÜ OSHI" ta sür sübosolemtsü ayokdak tesem ka Mokokchung Deputy Commissioner Thsüvisie Phoji-i (abelen nungi pungobuba) lapoktsür kelen Moamenla Longkumer (abelen nungi trokbuba) aser sentong nung adenertem kar tangokba noksa.

Mokokchung, Tsüklai/February 17 (TYO): Mokokchung nung tanu "SÜ OSHI" ta sür sübosolemtsü ayokdak ka Mokokchung Deputy Commissioner Thsüvisie Phoji-i lapoktsüogo.

Alima nung nüburtemi aben süoshi tapu balala pei den apert süboteper, iba dakji rangloker Mokokchung nübur asoshi iba sübotsü ayokdak ya "SÜ OSHI" ta nüngja agütsür lapok ta iba shishidak kibur Moamenla Longkumer-i iba takdang mesemtetba sentong nung jembidang ashi.

Moamenla-isa Mokokchung nüburtem joko danga bendangleni shishii maotsüsa sübosolemtsü tajung jenjang

talang agi tanur, tain, tetsür-tebur ajak asoshi yokpi yokratsü temulungtetba nung iba mapa ya inyak tenzükogo ta metetdaksü.

Sentong nung Mokokchung Deputy Commissioner Thsüvisie Phoji-i jembidang Mokokchung-ji shishilembatsü lenmang sadem sadema lir, anungji lanurtemi iba maongkaji agia shishilembaba nung temulung agüja Mokokchung ajungkettsü mangdang yur inyaksüla, ta ashi.

Tanü iba sentong nung Mokokchung Municipal Council Councillor Wabang Kichu, Assistant Commissioner, District administration aser pur medemsor aika dena liasü.

Assam CM anogoshi o melenshir: MP Gaurav Gogoi

Guwahati, Tsüklai/February 17 (Agencies): Congress lenir aser Parliament züngsem Gaurav Gogoi-i ashiba agi Assam Chief Minister Himanta Biswa Sarma teti o melenshir.

Gaurav Gogoi aser CM Himanta Biswa Sarma na anogo ishika yimtenren aser kija kibong tsütsü aitsütepa arur.

Himanta Biswa Sarma tenük nung reprang nung pa dak tarendak aliba aser pa sasa pa dak tamang makaba ahitettsü, ta Gogoi-i ashi.

"Anogoshi pa tangatetba melenshir, anogoshi pa o melenshir. Singapore nung mezüng anogo pai o ka jembi aser pongunü buba nung ano melenshi aser yashia ano balaka jembi," ta Gaurav Gogoi-i ashi.



Gaurav Gogoi

Chief Minister Himanta Biswa Sarma ya Congress tsübor ta jangjaogo, ta Gogoi-i ashi.

Sarma ya 2026 elections tsübor mesük, kong Congress-i takok angutsü ta pai meteta lir, ta ashi.

Sarma-i Assam nübur dang nangzükba ama melitet, ta Gogoi-i ashi.



Ahmedabad, February 17, 2025: US nungi meindokba India nungertem Hombarnü Amritsar nungi tayimtsü ajanga Ahmedabad nung aliba airport tonga aruba sülen tangokba noksa nung angur.

Linük tesem ajaklen NEP benoktsü: Pradhan

New Delhi, Tsüklai/February 17 (Agencies): Centre sorkari linük tesem ajaklen New Education Policy (NEP) benoktsü tebilemba lir, ta Hombarnü Union Education Minister, Dharmendra Pradhan-i metetdaksü.

Paisa, DMK-i yimsüsüba state (Tamil Nadu) nung NEP ajanga kaketshirtem matsüngdang Hindi mesüra tanga oshi kecha kangshia mebenoktsü, ta metetdaksü.

"Ajisüaka Tamil Nadu nung kaketshir kati shisaliok tsütsü oshi balala angazükba nung tai

ali asü?" ta paisa asüngdang. Osangbenertem den jembidangMinister-i, "Tamil oshi asütsüa akok, English mesüra tanga oshi balala asütsüa akok. Parnok matsüngdang Hindi mesüra tanga oshi kecha kangshia mebenoktsü. Tamil Nadu nung medemer kari iba onük nung politics asayar. Ajisüaka India sorkari NEP benoktsü aser NEP nung telatetbatem kar lir," ta metetdaksü.

NEP aser iba mapatong nung oshi asem formula dak sendakba nung Centre aser

Tamil Nadu sorkar na tsüngda mangatetep adoka aitsüteper.

"Tamil Nadu (sorkari) iba policy (NEP) mebenoker aser ibaji yimtenren tsütsü tebilemba kar ajanga lir, ajisüaka kaketshirtem tsüngda tetoktepba alitsü atema külem sabang ka alitsüla. NEP ya külem sabang ka lir. Ni oshi ajak akhümtsübur. Ato kilonser Modi-i apitetba NEP yagi tetsü oshi tongti südaksür. Tamil ya asen oshi tejentibatem rongnung ka lir," ta Union Minister-i Tamil Nadu Chief Minister M K Stalin nem metetdaksü.

Income teimba aruba party ji BJP liasü: ADR

New Delhi, February 17 (Agencies): 2023-24 kümsük nung income teimtiba aruba national party ji BJP liasü; iba kümsük nung BJP-i sen crore 4,340.47 angu, ta poll rights body ADR-i metetdaksü.

2023-24 kümsük nung national party 6-i anguba income nungi shilem 74.57 bo BJP income liasü, ta Association of Democratic Reforms (ADR)-i metetdaksü.

"Financial Year 2023-24 nung BJP-i parnok income sen crore 4,340.473 liasü saka iba nungjagi

shilem 50.96 dang indok ta sangdong. Congress income ji sen crore 1,225.12 liasü aser parnoki shilem 83.69 indok," ta kasa report nung shia lir.

National party temi anguba income shilem teimbaka electoral bonds ajanga anguba liasü.

Electoral bonds ajanga BJP-i sen crore 1,685.63 angu, Congress-i crore 828.36 angu aser Aam Aadmi Party (AAP)-i sen crore 10.15 angu.

Party aseme electoral bonds ajanga anguba sen ajak

sentepere crore 2,524.1361 liasü. Yaküm May ita nung Supreme Court-i electoral bonds anentsüogo.

Ano külen national party troki tenla ajanga sen crore 2,669.87 angu. Coupon ayokba nungi Congress-i sen crore 58.56 angu aser CPI(M)-i sen crore 11.32 angu.

National party temi indokba senotsü shilem teimbaka elections mapang nung indokba aser administrative maparen nung indokba liasü, ta kasa report ajanga metetdaksü.

Odisha nung küm pongu tsüngda tetsür 36,420 sama: CM

Bhubaneswar, February 17 (Agencies): Tesüiba küm pongu tsüngda Odisha state nung tetsür 36,420 aser tanur 8,403 sama, ta Hombarnü Odisha state assembly nung Chief Minister, Mohan Charan Majhi-i metetdaksü.

Majhi-i, tetsür 421 bo tanga state temi shibelenba liasü aser

iba dak sendakba nung nisung 453 puogo, ta metetdaksü.

2020 nungi 2024 küm tashi nung samaba tetsür 1,417 aser tanur 1,857 bo ngutetogo, iba dak alia state sorkari anojungi mapa tasak inyakdaksür tanur 784 kümsükogo.

Odisha nung tetsür aser tanurtem ozüing alema shibelenba

nokdangtsü atema Integrated Anti Human Trafficking Units (IAHTUs) 36 tenteta lir, ta Majhi-i metetdaksü.

Nisung shibelenba nokdangtsü atema awareness agütsür aser nisung shibelenba jangjatsü, bushisüngdangtsü aser nokdangtsü atema police nem special training agütsür.



February 17, 2025 nü New Delhi nung Delhi Congress Advocates aser Human Rights Department nungi ketdangser kar National Human Rights Commission office kima tangokba noksa nung angur. New Delhi railway station nung Mahakumbh temeshi ainer aoertem aika ajemsetba anema parnoki ken o ka benokogo.

OJALA TASOBA ANOGO PELAMUNG



Wt.Imsüwala Jamirtsür (Akhoya)
February 18, 1922 - 2025.

Talidak - Kuda village, Lane-1, Dimapur.

Tanü ojala aser otsüla arishi küm 103 abensaba anogo nung Tsüngrem tenüng sanga lar chinur aser semchirseemnurtem sarasadema amunger. Ojala den ano melishi jangratema lai sarasademtsüba temoatsü nung tasembenbuba semchir tashi lai angutsüsa Tsüngremer taochi nung onok lidagi. Ano, ojala nem Tsüngremi arishi talangka moajang ta sarasadema amunger.

Tsüngremi moatsüba Ojala
aser Otsüla'er Kinungertem.

TEPELA LEMSATEPER

LT. SAKUMAR LONGKUMER
(CHUNGTIAYIMSEN)



TASOBA: 02-05-1920 | TASÜBA 11-02-2025

"Ni rara tajungji raraogo, ni alizüng tonga asemogo, ni tamangji yuogo". (2 Timoti 4:7)

Tsürabur/Obala L.t Sakumar küm 105 tashi arishia lir, tasüba anogo tashi nung, arogo aser yimden, kidong, anükabang yimeryimsanger, yimkidanger aser ana aser talang nungi arurtem. Nenoki sarasadem, shisatsü aser rongsen agi yariba, kinunger ajaki nenok ajakdang kangasa pelaba lemsateper.

Temeim Chirnurtem & Semchisemnurtem.

OFFICE OF THE
JISA-SEMPO KIDONG KOHIMA UNIT

Kohima-797001, Nagaland

MOLUNGNEN

Tetsutamo Wt. Yarenjungla Longkumer, w/o Wb. Meyionen Jamir, Mongsenyimti-i asen Nagatsur rongnungi mezüngbuba obendanger pangdak Gauhati High Court Judge jenjang tulu tongtetba asoshi Mongsenyimti Jisa-Sempo Kidong Kohima Unit menden ajanga Konangnüngsang tulu agutsür aser tsüngchia pelaba sangdonger.

Tsüngrem tulusangi la takum aser tamaren wadang maneni tematiba jenjang nung ajungketa azükarudakjangma.

Wb. Imobendang Jamir
Secretary.



TIR YIMYIM
YIMOBILEM (EDITORIAL)

DIMAPUR SANGTENNÜ, FEBRUARY (TSÜKLAI) 18, 2025

Tamagitsü Order

Nagaland nung state government-i order-sa order agütsür saka aika mapa kuma meinyakteter ta aliba mapang ka, tawa Nagaland School Education Department-i tesayur noklang ter pezü dak tali shika school balalai yokba order dena reprangshitsüsa akümba mapa yagi state government inyakyim aser talisa School Education department inyakyim tamagitsü kümogo. Nagaland nung government school 1939 nung tesayur 18,726 lir aser itemji kodang inyakdangdir, school shia tesayur tugugu atar. Atangji, school ajakji kasa masü, anungji kar nung class takdang aika alitsüa akok aser ano kar nungbo ishika dang alitsüa akok, ajisüaka school shia nung takdang shia tesayur kakabosa alitsüabajibo, nübortemi menemnemyonga school education department-i inyakadoktsüla. Ajisüaka Nagaland government school-tem aika nung class takdangtem dang nungi tesayur ishiba aser ano kar nungbo school tanurtem dang nungi tesayurtem teimba, ano school kar nungbo tesayur agir magima, karbo class aginüseta class agi makor ta nüngdakba tesemtem nung masü saka tesayurtem aika pei linüdak lidaktsüba ajanga meteta aser memeteti Naga nunger chirnur tajung aika kaketshisatsü tajung mengutet taküm raksadagi. Atangji, town aser yimtsüng ta mali, tesem ajak nung sensakertem lir, anungji town-tem nungbo private school-tem lapoka lirji government school-tem maliyonga kecha masü ta masü saka tanü Nagaland School Education department-i mapa makokba ajanga town nung alirtem dang nungibo yimtsüngtem nung alir tanurtemsa takoksaba akoksadagi. Ano, yimtsüng nung alirtemsa süaka town anasa maliba yimtsüngtem, talisa Nagaland anüdoklen aliba yimtsüngtem nungbo government school mejungra, kecha tanga teimla mali, school mazüng anentsüba dang aser yamaji tanurtem aika tapayutsüka aser temulung shirangtsüka school-i onüseta taodak maka anener. Ibaji School Education department nung ketdangsertem majungba ajanga lir. Iba tiaji school education department reprangtsü lemzüksüba yimsüsür aser ketdangsertemi tonga tonga oagi reprangdangtsüla aser tanur shinga kaketshisatsü shitak mengui taküm meraksadaktsütsüla. Talisa, Kohima aser Dimapur nungbo government school shia tesayurtem agir magima yoka lir saka yimtsüngtem school kar nungbo tesayur ka dang aliba osanga angashir. Aji oda, school kar nung tesayur agi mabensar, kar nung Maths tesayur mali , ano kar nung Science tesayur mali aser kar nungbo Hindi junga mesayuteter ta Nagaland nung government school-tem ya tesayurtem shima ita sen agütsütsü atema dang ayu asü (?) mesüra tanurtem nem kaketshisatsü shitak agüja senso tajung kümdaktsütsü asoshi ayu (?) ta School Education department dang asüngdangnütsüka parnok mapa agi sayur. Joko, Nagaland nung Tsüngremi moatsüba Naga nunger chirnurtem tamajung kümdaktsüba repranga mekazüi School Education department nung inyakertema minister, advisor, Commissioner, Secretary aser Director-i anir khi temulung agütsütsüla. Talisa government kübok department ajak rongnung School Education department nung inyakertembo ita sen ngura ojang mesüra ni ajangzükra ojang ta bilema inyaktsüba mapa ka masü, parnokbo Tsüngrem tenzükbba mapa nung inyakertem den kasa dang, kechiyong tamachi nisung agi nüchi kümtsütsüba departmentji school education department aser kecha memetet shiruru ama aliba tia nungi nisung kuma arudaktsütsüabaji tesayurtem mapa lir. Ibaji angateta school education department nung inyakertemi inyakra, iba jagi metetmeteta Nagaland tajungba kuma melenshitsü. Aji oda, Nagaland nung sensaker chirnurtem tajung kuma anitettsü nükjidong nung, School Education department nung inyakertemi private school-tem dang nungibo government school-tem nung azüngertem tajungba akümtsüsa sayutsü kanga nüngdaka kümogo. Ita sen angu dangbo government school teayurtem teimba saka result adok dangbo private school tajungba ta asübaji Nagaland School Education Department-i khi saker reprangdangtsüla.

OLEMSABANG

MOLUNGYIMSEN NUNGER DEN KÜ
TEBİLEMBBA OREN KAR LEMSATEPER

~ K.Tia Longkumer,
Principal Haven of Hope Seminary Dimapur

Alima nung Tsüngremi yangluba rongnung meimchir ya lokti külemi yaritepa aliba telok, saka kadang lokti nungi pilaa lidir pa mesüra par telokji aiben timtem toushi nunga aser tepela mapang nunga kija azüngmeyak jenti ajurutsüsa akümer, anungji lokti den külemi yaritepa alibajiang ajak dang tajungtiba ta nibo bilemer. Tanü ner Arogo iba jenjangi aitsüsa akümba ya kechi tai ta nenokia khen tesüiba indang lepa reprangshitsü nüngdaker.

Taoba mapang 1940 kum ABAM-i pei Arogo tenzükba kum asüngdangdang nenok yimeri nenok Arogoji 1872 nung Molungkimong nung tenzükba Arogo ta langzüba asenoki meteta lir, saka kodang 1947 kum ABAM tenzüker kum 50 ajungba Jubilee amung iba Resolution nung Molungyimsen akumba 1876 October 24 anogojiang Ao lima nung mezügbuba Arogo tenzükba anogo ta ABAM lemtet agi nungji, ABAM kübok aliba Arogo ajaki iba anogoji munga aruogo saka kodang 1960 kum yim akumba anogoji Arogo tenzükba anogo masüa ta Lai tesayuba dak ajemdaker melenshi. Saka kodang Rev.Kijung Convenor ser Committee züngsem Lanuchiba Yaongyimsen, Ajangto Changki, Mayangnokcha Mokokchung, Stephen Imti Mokokchung, Takusüngba Ungma, Lanumeren Impur, R. Lisen Mokokchung, Evan. Ayu Impur. Par Committee nungi Rev, Kijung America-i anaben tashi oa Khrista dak amanga tzüsenba anogojiang Arogo tenzükba anogo asütsü ta Dr. Clark den parnok Missionary ishikati zülua ayuba record nguteta bener aru. Idangji ner yimeria tatembang nungbo haihaura kaa Arogo tenzükbaji tzüsenba anügo nung ajemdaktsü Mungdangi lemteta ayu. Saka ner yimerisa tzüsenba dak masü, yim akumba anogo aser kum dak ajemdaker 1976 nung kum 100 Jubilee amung. Aser idakji ABAM-ia shilem agia liasü. ABAM 1981 Special Committee Y. Amongba Mokokchung, Tsüktituba Ungma, Jangkidong Merangkong, Imnatangit Chuchu Town, Temjenkaba Dibuaia, Immangdangba Khari, Nüngsashiba Longchem, Tongbangyuba Lirmen, Rev.Sübongsüba Mopungchuket, Tarepyangba Longjang, Dr. I. Ben Wati Shillong, Dr. Renthly Keitzar, Rev. Imotemjen Guwahati, Tsüknungpenzü Mokokchung, L.T.Maja Impur (Convenor). Item Committee yagi 1960 Committee-puri ngutetba ama dang 1986 nunga tzü nung Tzüsenba anogoji dang Arogo tenzükba anogo asütsü ta Ao Mungdang dangi bener arua iba telemtetba agi aser idakji ajemdaker 1997 kum Molungyimsen Arogoa kum 125 sentong agi, idakji ABAM nungi Executive Secretary den ABAM tenzüker kar densema arua aden. ABAM-ia 125 Jubilee Impur nung amungdang tetenzükba sentep sentong nung Ao Arogotem pei Arogo tenzükba kum aser anogo flag nung zülua bener aturtem rongnung Arogotem rongnungi mezügbubaji Molungyimsen Baptist Arogo Pastor Rev. Y. Bendang-i flag ka nung Molungyimsen Baptist Church Estd. 1872 ta zülur Mungdang ki telung nung flag-ji songa ayu, pa sülen Merangkong Baptist Arogo aser tanga arogotem pei tenzükba anogo ama tatongi Pastortemi pe pei arogo flag-ji bener atua songa ayu. Iba kum nia sannüker ka ama ozü arogo flag bener atuba pilemteter. Yamaji lia arur külen ano 2021 kum ner Arogoisa 1876 October 24 dak ajemdaker Jubilee ka amung aser yangjia ABAM Executive Secretary arua shilem agi. Ano 2012 kum tetenzük nung ABAM Executive Secretary ajurua pa den ABAM tenzüker kar densema lia Molungyimsen Arogobo 1986 ABAM Special Committee-i lemtetba nungji noktaka lir aser ibajisa agitsüa ta ashi.

Ner Arogoi melenshiaka ABAM-bo mezüngyongi kechi nung noktaka lir yangji masetshii noktakbayong 1986 Rev.Riküm Executive Secretary ABAM mapang nung lemtetbaji tatembangbuba asütsü ta 1997 küm Rev.Dr. L.Kari Longchar Executive Secretary ABAM-i ner yimer dangi shiti zülua agütsüba angutsü. Maneni 2016 küm November ita nung Rev.Dr. Mar Atsongchanger Executive Secretary ABAM aser Rev. I. Wati Pastor President, ABAM, tenatia 1986 ABAM Special Committee lemtet-ji tatembangbuba ta zülur Molungkimong Arogo nema agütsüba kuli tejangja angutsü. Anungji tang nenoki angateta arua Arogoji yim akümba küm nungi masü saka Khrista dak amanga tzü nung Baptiba dak ajemdaker tenzükbaji ABAM lemtet amaji alitsüla, Laishiba tesayuba nung yimküme indang mejembir saka Khrista dak amanga tzü nung tzüsenba dak ajemdaker arogoji akümer anungji iba tangatetba nung nenok longjemer arogoji aotsüla. Iba tetuyuba nung ajemdaker Naga lima nung mezüng Arogo tentet ta angateter. Mezüng Missionary-temi lemteta yutsür asen Aori iba dakji ajemdaker lemtet tajung agir taküm agi küm 60 tuma arur. Iba lemtet ajanga ABAM khuret tulu bena arudagi anungji Tsüngrem tsübua tebu dang tebu jar tedi dang tedi jar ajemalua lokti den alitsü merangangma. Tesüiba mapang nung ner netsü-nebou nungeri mapa tajung aika inyakba otsüa angazüka lir, itemji shingai melenshitsü makok aser zülua alibatema nguogo, joko nenok tepong ka küma langer iba tangatetba nung longjemer oangma. Tarutsü nunga semchi-semnurtemi agizüktettsüsa nenok o nenok na opang ka sür Ao kin aser Naga kin ajak den süngpu aputepa alitsü merangang ta kü temepishiba ka shidanger.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Christian radio station-i raraba tesemtem nung yimjung ajungkettsür



Episcopal Conference of the Congo indang radio station noksa nung angur.

February 17, 2025: Alima nung rara aliba tesem aika nung Christian radio station-i yimsü balala amangertem ajak yimjung nung alitsü atema inyaker.

Khristan melungtet telok Aid to the Church in Need (ACN) den jembidang Burkino Faso nung aliba Radio Notre Dame nung Director, Alexis Ouedraogo-i, pa indang radio station-i linük nung kiralongartem anema inyaker, kechiyong iba telok jagi Burkinabè nung telemsa adokdaksütsü meranger aser nüburtem tsüngda raradaksütsü meranger, ta ashi.

Father Alexis-isa tamangba yimsü balala amangertem tsüngda yimjung ken o jembiba ajungkettsütsü atema pai Islamic lenir ka den jembio.

Pai Islamic lenir dangji, mangatettep alibatem ajak bentettsü atema raraba ya tim lenmang masü, ta ashi.

"Yimsü balala tsüngda yimjung ken o jembiba ajanga asenok tsüngda tesendaktep tajungba akümtsü aser asenok tsüngda kati ka tenzükteptsü. Yamaji inyakba ajanga asenok tsüngda tesünep nung jangratema alitsü," ta pai ashi.

Yaküm melungtet telok ACN-i alima tesem balala nung

linük 19 nung radio project 22 yaritsü atema pound sen 450,000 teyari agüja liasü.

Item projects rongnung Democratic Republic of Congo (DRC) nung Boma Arogo indang Radio-Television team densema lir. Taküm küm tetenzüklen M23 telungpurtem aser sorkar sepaitem tsüngda rara tenzüka liasü, iba sülen telungpurtemi Goma yimti anüdoklen tsütsübo agiadokogo.

Iba rara ajanga nisung million aika jenshiogo, hospital nung nisung masemer aser refugee camps-a amaker.

ACN-isa Haiti aser Ukraine na nunga radio projects yaridar.

Nüngtugu sayutsüngir Dr. Jim Shaddix alima nungi pilaogo



Dr. Jim Shaddix

February 17, 2025: Nüngtugu Baptist sayutsüngir, Dr. Jim Shaddix mapang talangka tekolok cancer agi shiranga aruba sülen süogo; pa arrshi küm 64 liasü.

Shaddix ya W.A. Criswell Chair of Expository Preaching nung Preaching Professor liasü aser Center for Preaching & Pastoral Leadership nung senior fellow liasü, ta North Carolina nung aliba Southeastern Baptist Theological Seminary-i metetdaksü.

Seminary-i, "February 1 nü Shaddix asen Kibuba aser Kümtetdakba den alitsü atema kidangi ogo," ta metetdaksü.

Southeastern Baptist Theological Seminary Tir, Danny Akin-i sangdong ka ajanga, "Jim Shaddix ya khenyongi balaka liasü aser Kibuba Yisu Khristar Arogo

atema kanga senti liasü. Ajaki pa meima liasü aser tembar tajung ka liasü. Pa ya tesayur tajung ka aser Lai O sayutsüngir tajung ka liasü," ta metetdaksü.

"Pa ya len sayur tajung ka aser nütsüngsür tajung ka liasü. Pa ya kinüngbu tajung ka, tebu tajung ka aser tebou tajung ka liasü. Tongmelang agi, pa ya Tsüngrem nisung ka aser Chuba Yisu tenzüker tajung ka liasü. Ni pa kanga menungratsü, ajisüaka kenü anogobo ni pa tanaben ajurutsü ta meteta kü melung süneper," ta paisa metetdaksü.

Shaddix-i Southeastern nung tesayur mapa inyakba densema küm 40 dak tali Tsüngrem tenzüka aruogo. Pa ajanga nisung aika taküm nung temelenshi adokdaksüogo.

Seminary-i pa nem tetushi agüja, "Sarasadem walunir ka aser sayutsüngir ka ama Dr.

Shaddix-i mezüngbuba nung Tsüngrem sentsüwangshi bushi. Pai lanur pastor tem aika aniteta liasü aser Laishir meyrjang aika dang Tsüngrem O teratet sayu," ta metetdaksü.

"Tsüngrem O sayutsüngitsü atema tangartem renemtsütsü asoshi pa dak tejangraba tulu liasü aser pai sayuba ama atangji pai pa taküm ali," ta sangdong nung shia lir.

Shaddix-i tatem tashi Khrista osangtajung, Arogo aser Kibubai tenyaba wadang nung rangloker inyak. Pastor tenzüksü atema pai lanurtem aika aniteta liasü.

"Tasünü tashi pa aser pa kinüngtsü, Debra nati Kibuba dak tamang ayu. Southeastern seminary atema par kibongi mapa tulu inyakba atema pelar," ta seminary-i metetdaksü.

Shaddix nem akhüm agütsütsü atema Southeastern-i online memorial page ka lapokogo.

Memorial page nungji yamai shia lir, Shaddix-i Kangki indang tejangja angatetba sülen pa arrshi küm 9 asüba mapang nung pa Khristan aküm.

"Laishiba nung aliba teimlaji alima nung teimla den khenyongi balaka. Alima nung teimlaji ataloktsü akok mesüra mataloktsüa akok, ajisüaka tamangertem atema Khrista dak teimlaji atangji," ta pai jembia liasü.

Seminary indang Binkley Chapel nung February 7 tatembangbuba asüpila sentong agia liasü.

ANO GO ABEN TSÜNGREM DEN TEMESHIPUR ALIDAK PAI MOATSÜR

Temenen pur ki nung Kibuba atakatem lir: Saka temeshipur talidak Pai moatsür.

~ A. Shin 3:33

Alima nung meimchir asoshi iba lima nung ali tashi ali rongsen nüngdaker aser aji tim dang, saka rongsen ya tim lenmang nungi bener arutsü,ochishia tim nung ketdang asütsü Lai O nung abensa-a shia lir. Meranga meinyaki aser ochi lenmang nungi mesüi anguba rongsenji lendong aketba rongsen ta shiteter kechiaser iba rongsen dak tashishitsü keta lir koba tim lenmang nungi anguba rongsen masü. Ano rongsen kütdangsüba nung aikati aibelener, kadang nisungi rongsen ajak Tsüngrem nungi la angateta ochi lenmang nungi rongsen mebendentir kütdangsüba nung aibelentsüsa. Rongsen tim ketdang mesütetra Tsüngrem shilem nungi tenzüker nüngda balala ajak nung aibelena tia makara atakatem tashi ajurutsü.

T.Ken 37:25nung. Dawidi ashi, Tangbo ni tambur kümogo, saka kü lanuwa nungi temeshipur senzüka yutsüba ni mangu, mes?ra pei chirtem meshimetsübs munguka. Iba o ya Dawidi ajangshiba kuli zülua doktsübs lir. Shirnoki Tsüngrem mulung chidakja liteter ibaj kodanga amajok masütsü chirnur aser semchirtem tash iba temoatsü nung alitsü.

"Asen mulungjang ajak Tsüngrem nem agütsira ases nüngdak ajak Pai ataloktsütsü

Open Doors-i African Union lenirtem dang rara anendaksütsü ajungshi

February 16, 2025: Khristan ka nung iba senden ya melungtet telok Open Doors-i African Union (AU) nung lenirtem dang Africa continent tesem ajaklen rara anendaksütsü atema ano tali temerangba inyaksü ajungshiogo.

Tan hopta tatembanglen 38buba African Union Summit nung linük balala nungi tongti lenirtem shilem agia adentsü.

Tang Africa kübok talisa Democratic Republic of Congo (DRC) aser Sudan na nung telok balala tsüngda ano tesashiba raraba mapang nung Open Doors-i African Union dang continent tesem ajaklen rara anendaksütsü atema inyaksü ajungshir.

DRC aser Sudan nung rara ajanga civilian noklang aika süogo aser nisung meyrjang aika jenshiogo. Ano Africa kübok Sahel region aser Somalia nunga rara manener.

Open Doors nung freedom of religion analyst, Illia Djadi-i, iba tensa süngjemtsü atema inyaksüji African Union lenirtem khuret lir, ta ashi.

"Iba (summit) ya kanga tongtibrang senden ka lir, anungji onok teimla aika lir. Africa nung rara tesashiba akümba mapang

ka nung iba senden ya ayongzüker," ta Djadi-i metetdaksü.

"Africa nung sensotemia teimla tulu akar. Parnoki yimjung aginer aser rara anendaksüner," ta Djadi-i metetdaksü.

Alima nung Khristantem atema linük tamajungtiba 10 (Top Ten on Open Doors' World Watch List) rongnung Africa nungia linük pongu- Somalia, Libya, Sudan, Eritrea aser Nigeria linüktem densema lir.

"Reshikangshi ajangshiba Khristantem densema minorities nem security agütsütsüji item linüktem teinyaksü mapa lir," ta Djadi-i metetdaksü.

"Arogotem ya civil society group nung densema lir, ajisüaka tongti telemtetba agiba nung parnoki tongti shilem magiteter, ajisüaka ola adoktsü atema Arogo dak temeden lir," ta Djadi-i metetdaksü.

"Onoki African Union senden nungji lokti tentettem, talisa Arogoi lemsatepba tebilemtsü onüktemji jungjunga angadaksüner, kechiyong continent nung nisung million aika madak lenirtem rongnung Arogo lenirtem densema lir," ta Djadi-isa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tejen****(adj)** tasen masü, mapang talangka süiba (old)

*Ozü kidang tsüngsem tejen aika lir.

Tejenokdak**(n)** lendong timtem nungi kümzük dak (refuge)

* Tsüngremjiang asen tejenokdak lir.



Tir Yimyim

OLONG PAITEP # 7067

	1	2			3		4		5
6							7		
					8		9		
			10						
11									
				12					
13		14		15					16
17							18		

TIPLIN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S ____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ____ hi - (3)
16. Akümüli nungi pilar - (3)

OLONG PAITEP # 7066 TELANGZÜBA**TIPLIN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA

Meerut nungi yoga practitioner Vikas Swami-i pa tepo agi seret 125 ajungketba ajanga Guinness World Record ka yangluogo.

Tawa Milan, Italy nung Guinness World Record competition alidang Swami-i iba otsü yanglu aser iba mapang par jabaso ana Anmol Swami (16) Aditya Swami (10) nati pa yaria liasü.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur Chuba-i**Governor den ajurutep**

Imphal, February 17, 2025 (Agencies): Manipur chuba aser Rajya Sabha MP Leishemba Sanajaoba-i Manipur Governor Ajay Kumar Bhalla den ajurutepa senden ka menogo.

Manipur nung tang President's Rule benoka lir aser Hombarnü Raj Bhavan nung tena senden amendang state dak sendakba tensa osang lemsatep.

February 11, 2025 nü Parliament nung Zero Hour mapang MP Sanajaoba-i 1949 Manipur Merger Agreement timi inyaksü sorkar ayongzuka liasü.

1949 Manipur Merger Agreement kümzuka ayutsü atema temzüng shitak lateta mali anungji sorkari item onüktem atema mapa inyaksü ayongzüker ta MP Sanajaoba-i ashi.

Governor Bhalla-i COCOMI dang sorkar den amaliteptsü ayongzük

Imphal, February 17, 2025 (Agencies): Manipur Ajay Kumar Bhalla-i Raj Bhavan, Imphal nung Coordinating Committee on Manipur Integrity (COCOMI) den senden ka menogo.

COCOMI ya Meitei CSOs ajanga tentetba sabang ka lir aser Covenor Khuaijam Athouba-i anir Governor den senden amen.

Convenor, COCOMI Kh. Athouba-i anir nisung troki Manipur Governor Ajay Kumar

Bhalla den ajurutepa senden amen ta Raj Bhavan sangdong ka nung ashi.

Idangji COCOMI-i memorandum ka agütsüba nung Manipur nung tebilemstü onük tongtipang kar dena liasü aser parnoki Governor dang state ajungtsü atema mapa inyaksü mepishi.

Governor Bhalla-i parnoki ashibatem angaba sülen tensa süngjemstü atema sorkar den amalitep alitsü metetdaksü.

COCOMI-i Manipur nung

President's Rule magizüker aser iba ya ozüngi memelaba aser meshisadangi inyakba mapa ka lir ta aitsür.

COCOMI-isa Manipur nung alirtem dang kümdanga alitsü aser parnok mitkar yimsüsüba kübok malitsü atema longjemstü ayongzüko.

"Iba ya lenisüba indang tebilemstü dang masü saka Manipur tarutsü aser democratic temetentem kümzuka ayutsüba mapang ka lir" ta COCOMI-i ayongzüko.

6th Schedule areas atema Central funds mali: CM Sarma

Guwahati, February 17, 2025 (Agencies): Kokrajhar nung Assam Legislative Assembly session nung Chief Minister Himanta Biswa Sarma-i mapang talangka Assam nung 6th Schedule areas nung senotsü agütsüba indang onük jangjashitsüogo.

Assembly session nung public den indangindanga jembidang Centre sorkari 6th Schedule areas atema senotsü melemzüksür ta Sarma-i ashi.

"Centre sorkar nungi 6th Schedule areas atema senotsü kecha mangur. Centre-i yokba sen state sorkari sota ayur ta

jembir. Ajisüaka 6th Schedule areas atema Centre-i senotsü kecha magütsür. Senotsüji state sorkari dang agütsür" ta CM Sarma-i ashi.

Tang governance model kübok state sorkari lisopur kin balala den osang agiteper aser Kokrajhar, Dima Hasao, o Karbi Anglong amala tesemtem asoshi senotsü agütsütsü Centre dangi osang yoker ta pai ashi.

"State Owned Priority Development (SOPD) ajanga state sorkari Bijni atema Rs 40 crore aser tanga tesemtem atema Rs 20 crore lemezüksütsü

telemtetba agira, item senotsü angurtemi mezüngyongi magizüksü" ta Sarma-isa ashi.

6th Schedule areas nung state rongsen kasasa alemstü atema o atsütepa aruba mapang ka nung CM Sarma-i iba osang jangjatsüogo.

6th Schedule areas nung lisopur kintem aser teloktemi state sorkar dang nungi infrastructure tajungba aser teyari aginüa arur.

6th Schedule areas atema senotsü kecha sota mayur mesüra tim mesüi amshiba mali ta tanü CM Sarma-i jangjashitsüogo.

Assam Police-i Gaurav Gogoi kinungtsü ken o bushisüngdangtsü

Guwahati, February 17, 2025 (Agencies): Congress MP Gaurav Gogoi kinungtsü aser Pakistani nung ka onük bushisüngdangtsü atema Director General of Police (DGP), Assam Police-i Special Investigation Team (SIT) ka tentetogo.

SIT nem Unlawful Activities (Prevention) Act (UAPA) aser Indian Penal Code kübok bushisüngdang asütsü mapa lemezüksüogo. CID Police Station nung benoka aliba ken o parnoki bushisüngdang asütsü.

Iba ken o ya ozüng alema inyaksangshiba aser tanga maparen indang lir. Assam DGP-i SIT nung M. P. Gupta, IPS, Senior Deputy General of Police (SDGP), CID,

Pranabjyoti Goswami, IPS, Additional Inspector General of Police (AIGP, Administration) - Member, Rosie Kalita, APS, Superintendent of Police (Chief Minister's Security Vigilance) - Chairman, Member aser Moitrayee Deka, APS, Additional Deputy Commissioner of Police (West), Guwahati - Member nung shimogo.

SIT-isa nüngdakba mapang Inspectors, Sub-Inspectors, aser Constables shimtsü aser iba atema Assam Police Headquarters nungi temelaba meshitsü.

Assam Police nung Criminal Investigation Department (CID)-i Pakistani senso Ali Tauqeer Sheikh anema ken o ka

benokogo. Bharatiya Nyaya Sanhita aser Unlawful Activities Prevention Act kübok ken o benoka lir ta Chief Minister Himanta Biswa Sarma-i ashi.

Sheikh-i Congress MP Gaurav Gogoi kinungtsü Elizabeth Gogoi den tesentaktep aliba atema bushisüngdangtsü.

Elizabeth Gogoi ya British senso ka lir aser la Islamabad nung alidang 'Lead Pakistan' den inyaksema liasü. Idangji lai India aser Pakistan nung climate change organizations den inyakdang Sheikh den metettepa aküm.

Sheikh-i Pakistan sorkar aser ketdangsurtem den tesentaktep tajung lir ta chief minister Sarma-isa ashi.



OFFICE OF THE
YAONGYIMSEN SENSO TELONGJEM DIMAPUR
Dimapur : 797112, Nagaland

TENÜNGSANG AGÜTSÜR

Yaongyimsen nung Wb. Temjenchuba Imsong aser Wt. Rongsensangla Jamir na jabaso **Wb. Watinungsang Imsong** International Masters League (IML) asayamung nung South African Legends Team asoshi Assistant Coach shimtetba atema Yaongyimsen Senso Telongjem Dimapuri pa nem tenüangsang tulu agütsür. IML asayamung ya Navi Mumbai, Vadodara aser Raipur nung February 22 nungi March 16, 2025 tashi asayatsü. Wb. Watinungsang Imsong ya ICC-certified coach lir aser North East India nungi International coach mezüngbuba shimer asütsü.

Pai Cricket asaya nung alimai metettsüsa takok tajung anguba agi Northeast aser talisa Nagaland nem tenüng tajung bener arutsüogo. Iba takok asoshi YSTD-i kanga nümadanga pa nüng tushir aser ano maneni pa mapa nung Tsüngremer temoatsü aser takok lidakjangma ta sarasademtsür.

Sd/-
Imlilepzük,
President.

Sd/-
Mar Longkumer
General Secretary.

Russia-i Ukraine ken o US den jembitsü

Moscow, Tsüklai/February 17 (Agencies): Ukraine rara tembangtsü atema jembishinütsü asoshi Russia nungi ketdangsür ana Saudi Arabia-ia oa yangji United States nungi ketdangsür ajurutsü, ta Kremlin-i shiogo.

Russian Foreign Minister Sergey Lavrov aser Tir Vladimir Putin indang foreign policy adviser, Yuri Ushakov na Hombarnü Riyadh-i aotsü, ta Kremlin odongtar Dmitry Peskov-i ashi.

Tenati Ukraine atema yimjung ken o jembitenzüksü asoshi renemshia US Secretary of State Marco Rubio ajurutsü imlar.

"Ano Ukraine pangzük ka asoshia jembishinü akatsü akok aser tir ana tsüngta senden ayongzüksü atema jembitsü," ta Peskov-i ashi.

Taoba mapanga US Tir Donald Trump-i Saudi Arabia nung Putin ajurutsü akok ta jembia liasü. Hopta tatemlen Trump-ia iba ama senden ka yakta amentsü ta ashi.

Iba senden ya Russian-American tesendaktep ajunga tajungba kumshiba nung rangloktsü, ta Kremlin

odongtari ashi.

Russia indang sovereign wealth fund tekolak Kirill Dmitriev ya senden nung adentsü ta angashi, kong US National Security Adviser Mike Waltz aser White House Middle East envoy Steve Witkoff nungera Riyadh-i aotsü.

Rubio-i Deobarnü ashiba agi, Mongulbarnü senden nung Ukraine adentsü aser rara atemtsü atema tesatamba nung sensaksemtsü merangtsü.

"Yimjung asoshi inyakyim ya senden ka nung atemtsü masü," ta pai osangbener dang ashi.

Riyadh nung jembishinütsü jangjaba mapang European lenirtem Paris nung senden mena Ukraine indang policy taoksatsüka Washington-i melenba indang nung telangzüba agütsütsü atema jembitsü, kechiaser US sentong nung Kyiv aser par European allies tem senzüka yutsür.

Trump-i Ukraine nung yimjung atema Putin den indang-indanga jembitsü tebilemba lir ta sangdonga lir, shibai küm asem tejakdang

nungi par kidanger linük nung tashi ajak amshia amaker. Hopta tatemlen US ketdangsür temi Europe densemtsü meimlar ta shia liasü.

Aser iba yongji US tiri Russia nem tajangzük agütsütsü aser Europe indang security architecture aser US defence partnership tashi mait akumtsü akok ta aoksateper.

Trump sentong nung Moscow pelar aser Ukraine nung tangatettep arutsü asoshi jembishinüba nung European adentsü anojungi lir, ta Peskov-i ashi.

France nung senden ka amentsü lia Spain indang Foreign Minister Jose Manuel Albares-i ashiba agi, tashiyim amshia Russia nunger sempet ngur tembangtsüsa yimjung ken o jembishinüba nokdangtsü asoshi European lenirtemi jembitsü.

"Tashiyim amshia raraba nem sempet magütsütsüla, dangari tashiyim amshia rara tenzüksü majungshitsüla. Putin-i maneni Ukraine amaktsü ta tanü ni ajiteter. Anungji tangbo ni yimjung mangur," ta pai ashi.

US-i website nungi olen ka aginba atema China mepelar

Washington, Tsüklai/February 17 (Agencies): US State Department-i, parnok indang website nungi, 'Washington-i Taiwan nüjiso pu masemer' ta zülua aliba aginba ajanga China mepelar.

China-i, iba temelenshi ajanga Taiwan nüjiso atema nokdakertem nem osang tai agütsütsü ta shia US dang parnok aibelen metongshitsü takhangba ka agütsüogo.

Taiwan-US tesendaktep dak sendakba nung taoba mapang department indang fact sheet nung "onoki Taiwan nüjiso pu masemer," ta zülur liasü, saka taoba hopta update asüba mapang aginogo.

US otongdar kati ashiba agi, parnok "One China" policy atema bendanga agütsür lir, kong US ya Taiwan den masü saka China den-ang formal tesendaktep yua lir.

China-i Taiwan ya parnok nungi jakzükba province ka ama züngshir aser mapangtong nung linük den shilem ka akümstsü aser nüngdak dang süra tashiyim agi aziüoktsü ta shia arudar.

Taiwan nunger aikati parnok ya linük balaka ama züngshir saka prnok timba

kati parnok ya China nungi nüjiso ngur aliba linük ka ama mesangdonger mesüra China dena longjemer meliner.

Fact sheet koba Brehostibarnü uptade süa liasü, iba nung Taiwan dak sendakba olen aginba dang masü saka US-i temsüa aliba tesemtem nungbo international lokti tentettem nung Taiwan züngsem agizüksü ta shia lir.

Temelenshi indang jembiba mapang Taiwan nung American Institute indang otongdar kati local media dang ashiba agi, Taiwan den US tesendaktep indang nüburtem nem metetdaksütsü atema fact

sheet update süogo.

Deobarnü Taiwan indang Foreign Minister Lin Chia-lung-i iba temelenshi atema US dang kanga pelaba lemsatepogo.

Ajisüaka Hombarnü osangbenertem den sensakseмба mapang Beijing indang foreign ministry-i iba jenjang agiba ya aitsüogo aser Taiwan dak sendakba nung US tenokdakdak kanga melenshiogo, ta ashi.

"Onoki US dang parnok aibelen tangsa tang melenshitsü aser One China principle sülen anidaktsü mepeshir," ta ministry-isa shisem.

Taliban lenirtemi Japan mezüngbuba semdanger

Tokyo, Tsüklai/February 17 (Agencies): Afghanistan yimsü asüba Taliban lenirtem tang mezüngbuba Japan semdangtsü tonga aruogo, ta Japan nung media sandong balala ajanga metetdaksü.

Lenirtem rongnung foreign affairs, education, economy aser health ketdangsürtem densema lir aser parnok hopta ka atema Deobarnü Japan tonga aruogo, ta Asahi

Shimbun osangkaket sangdong ka ajanga metetdaksü.

Japan semdangba ya Taliban asoshi khenyongi balaka lir, kechiyong 2021 küm parnoki sorkar atsüngba sülen Afghanistan yongtsü nung dang inyaksangshia aruogo.

Taliban lenirtemi humanitarian teyari meshitsü aser diplomatic tesendaktep atema Japan nunger ketdangsürtem den

MULUNG CHIA PELABA-O



Onoki kodanga amadoktsu makokba temeimtila ojala **Mrs. Tsuknugrenla Jaimr (Chuchuyimlang)** Kibuba dangi aoba anogo Feb. 12, 2025 nung temeimba adianuntem shirnokisa rongsen, nübu aser tenla tulu agi ozü asükü den yaritepogo, nenok ajak dang mejembitetba tepela tulu lemsateper. Ajioka ayuba Tsüngremi nenok takümtem ajak lepa moajangma ta ozü kinungertem tamang sarasadem .
Temeim chirnur aser kinungertem.

TENÜNGSANG AGÜTSÜR

Tepela agi Tsüngrem tenüng sanga **Wt. Moakumla Ao**, W/o Wb. Subonenba Longkumer ajanga St. Joseph University, Dimapur nungi Management nung Doctor of Philosophy (Ph.D) jenjang ngutetba asoshi la nem khonang nüngsang tulu agütsür. Lai la bushiba wadang nung bendanga agüja meranga inyakba tah tajung ajangzüktetoni! Tarutsü anogotem nunga maneni



Lai bushiba wadang aser maparen ajak nung temoatsü aser takok tenang ta teyanglur Tsüngrem dang temoatsü meshitsür.
Temeim kinungertem.



OFFICE OF THE
MONGSENYIMTI SENSO MUNG DANG
B.P.O MONGSENYIMTI P.O. CHUCHUYIMLANG
DIST: MOKOKCHUNG NAGALAND-798614

NÜNGSANG YIMYIM METANGOKTSÜR

Linük rangpen nungi mongin O Bendanger jenti rongnungi tekümdang, teshisadang aser taremsük jakla adener Takotet Wt. Yarenjungla Longkumer ajanga nübur ajaki akhüm tetushi agütsüba menden ajangzükteta Additional Judge, Gauhati High Court tongtetba nüngtem nung terenemtet lenir nem tetushi tulu Mongsenyimti Sensosanger inti tenüng nung Mongsenyimti Senso Mungdang Mendendi ajanga metangoktsür. Asen leniri Nagatsür rongnungi mezüngbuba iba temaba menden tongteta arok nümadangtetsü khonang tulu bentsür aruba nüngsanga taroktiba tepela tenüngsang agütsür.

Wt. Yarenjungla Longkumer Taküm Ajangjem Bentet tongmelang:

- Matriculation: Little Flower School, Kohima, 1983.
- B.A. (Hons): Lady Shri Ram College, New Delhi, 1988
- LLB: Campus Law Centre, New Delhi, 1992
- Joined the Government Panel as Jr.Govt. Advocate, 1996
- Worked as Jr. Govt. Advocate, Additional Sr. Govt. Advocate and Sr. Govt. Advocate till early 2013.
- Recruited as District & Sessions Judge by the Gauhati High Court in 2013 and joined service in April 2013.
- Served as District & Sessions Judge Kohima, Special Judge Lokayukta, District & Sessions Judge Dimapur twice, Registrar Gauhati High Court Kohima Bench and Secretary Judicial, Law & Justice Department, Govt. Of Nagaland.
- Appointed and Swearred in as an Additional Judge of Gauhati High Court, February 2025.

Linük temzüng kübok meyong nem agia Ochi phuküma asen nubur ranglok tasen ka nung tenzüka aodang Tsüngremer tawabangba aser leniba teti lenir madak alitsü sensosanger tamang sarasadem.

Sd/-
(IMOTONG)
President
Mongsenyimti Senso Mungdang

Sd/-
(S.NOKINLEMB)
Secretary
Mongsenyimti Senso Mungdang

sensak asemstsü imlar. Taliban indang economy ministry nung deputy minister Latif Nazari-i ashiba agi, international lokti tentet nung teyakyak züngsem ka akümstsü atema par teloki merangdanga aruba nung tang Japan semdangba ya shilem ka lir.

Afghan diplomatic sources kati ashiba agi, Taliban lenirtemi Japan sorkar ketdangsürtem den parnok sensak asemstsü imlar. Taliban indang economy ministry nung deputy minister Latif Nazari-i ashiba agi, international lokti tentet nung teyakyak züngsem ka akümstsü atema par teloki merangdanga aruba nung tang Japan semdangba ya shilem ka lir. Afghan diplomatic sources kati ashiba agi, Taliban lenirtemi Japan sorkar ketdangsürtem den parnok

tebilemba lemsateptsü sentong lir, ta Japan indang public broadcaster NHK-i metetdaksü.

Taliban sorkari kidanger aser Central Asia nung linüktem, Russia aser China mapangshia semdanger saka yimya agi tanga linüktembo mesemdanger. Parnoki 2022 aser 2023 küm diplomacy summit atema dang Europe nung Norway semdanga liasü.

49buba PCC asayamung tenzükogo



Dimapur, Tsükali/February 17 (TYO): 49buba Patkai Christian College (Autonomous) Annual Sports Week tanü college ground nung tenzükogo aser iba ajanga kaketshirtem, faculty aser tejaoker tem longjemdaksüogo.

Taküm iba asayamung nung house troki shilem agidar. Asayamung ya Dr Vichükho Ngukha, Chaplain, PCC-i sarasademer tenzük aser Assistant General Secretary (AGS) SUPCC, Cheimirin Valui-i lokti pela agizükba o jembia liasü.

Sentong nung alakteta jaoker Step Academy

ngutetsang Worrin Muivah-i lokti ayongzüka liasü. Muivah-i kaketshirtem tarutsü yanglutsü atema saisapong aser extracurricular activities tem koda tongtibang iba indang lemsatöp.

Paisa, lenisüba ya koda tongtibang indang lemsatöp aser lenir ka aser saisapong indang tesendaktep lemsatöpba mapang Fortune 500 company tem nung senior executives shilem 80-i bo college azüngba mapang asaya balala asaya liasü, ta ashi. Kechiba ta süra asaya ajanga, taremzüker aser teamwork amala lenir ka dak keta

alitsüba yimya tajungtem sayur, ta pai ashi.

Paisa, hopta tepeyong asaya balala jangradema asayatsü asoshi imlaja ataba lemsatöp liasü.

Tepelaba temaitsü Muivah-i Student Association nem tenla tajung agütsü aser Step Academy nungi fully funded scholarships ana agütsütsü maongka agüja liasü.

Maneni Muivah football ka metsüokja iba asayamung officially tenzükja liasü.

Hombarnü 100, 400, 800 aser 1200 metre race, relay races aser basketball ta asayaogo.

Mon nung Inter Departmental asayamung tenzükogo

Dimapur, Tsüklai/February 17 (TYO): Officers' Club Mon tawabangba kübok 11buba Inter Departmental Tournament February 17 nü tenzükogo aser February 19 nü tembangtsü. Iba asayamung ya Officers' Club Mon (OCM) nung asayadar.

February 17 nü asayamung lapokba sentong nung Deputy Commissioner, Mon Ajit, IAS alakteta jaoker aser Kanchan Kumar Kandpal, IPS, SP, Mon tetushi tejaoker liasü.

Sentong nung o jembiba mapang Kumar Verma-i, iba asayamung takok ngudaksüba atema officer aser team tem dang kanga pelaba lemsatöp. Paisa, Mon nung Officers' Club amenoktsü atema jenjang agiba atema officers tem nem tenüngsang agütsü, koba state nung mezüngbuba ka asütsü, ta ashi.

Paisa, iba ya officer tem aika atema angazüktsü, sensaksemtüsü aser kati ka angatetteptsü asoshi sabang tajung ka ta shia, züngsem ajak dang iba maongka ya agütsü ajungshi. Paisa, ochishia aser team tanüla tajung benoka asayatsü ajungshiba den asayartem ajaki kanga junga asayatetsü

implaja ataba lemsatöp. Paisa asayamung tenzükja liasü.

Kasa mapang nung tetushi tejaoker Kanchan Kumar-i, iba amala asayamung ka ayongzüksü atema officer temi parnok mapang intok mesasai inyakba atema parnok nem tenüngsang agütsü. Paisa, Mon District lenla ajak nung terenlok asoshi maneni tang ama teka

amteper inyaksü ayongzüka liasü.

Asayamung nung shilem agirtem tenangzükteoba ya Er. Tingten, EE (Power)-i achaaayanga agia liasü. Asayamung lapokba sentong ya ADC Mon, aser OCM General Secretary Pakon Phom lenisüba nung agi. Sentong nungsa Yangman Lukhim-i ken tajung ka tena liasü.

Kane Middlesex nung denogo

Tsüklai/February 17, 2025 (Agencies): New Zealand nung batter Kane Williamson, 2025 season atema Middlesex nung denogo aser pa County Championship aser Vitality Blast asayatsü.

Arishi küm 34 tain asayar ya New Zealand nung asayartem rongnungi Test asaya nung run timtiba yangluba asayar lir aser kidang lemluwa mapang pa bendanglen maongka bushia aotsü atema taoba season white-ball captain mapa tokja liasü.

Williamson, T20 Blast group fixtures nung Middlesex pur asaya 14 nungi 10 nung aser season tanabuba shilem nung County Championship asaya pongu nungbo asayatetsü.

"Alima nung sempet tajung aketba asayar tajungtiba ka anisemtetba ya tajangzü tulu asütsü," ta Middlesex director of cricket Alan Coleman-i ashi.

Williamson-i par linük tenüng nungi 366 ben asayaba mapang run 18,000 dak tema yangluogo kong century 47 yangluba densema lir.

Pai Test asaya 105 nung run 9,276 yanglua lir, koba linük puti otsü nung asayartem rongnungi run timtiba yanglutetba lir. Pa indang average ya 54.88 lir.

2019 World Cup nung pa nem player of the tournament naroküm agütsü aser taoba annual International Cricket Council men's Test Team of the Year awards 10 nung tenet nungbo pa züngoksemogo.

U-23 Basketball Nationals atema trails ayonger

Dimapur, Tsüklai/February 17 (TYO): Nagaland Basketball Association (NBA)-i sangdong ka ajanga tetsür aser tebur naprongla asoshi U-23 trials February 24 nü agütsü ta metetdaksüogo.

Trials ya kasa anogo Kohima nung Don Bosco HSS Basketball Court aser Dimapur nung Tetso College Basketball Court nung nikongtsütsü 3:00 ako nungi tenzükja agütsü.

NBA General Secretary-i ashiba agi, iba trail nung shimertem Nagaland tenüng nungi 1buba U-23 National Basketball Championship nung asayatsü.

Iba asayamung ya Karmabir Nabin Chandra Bordoloi AC Indoor Stadium, Sarusajai Sports Complex, Sarusajai, Guwahati nung March 18 nungi 24 tashi asayatsü.

Iba trails nung shilem agütsü atema asayar kaji 2002 küm January 1 nü mesüra iba sülen asor ka asütsüla aser asayartemi pai Aadhar Card aser Birth Certificate bener arutsü nüngdaker ta, kasa sangdong ajanga metetdaksü.

For Kohima Contact: 94360 16529, 85751 91708 "For Dimapur Contact: 98640 34256, 70859 94276

Khelo India Winter Games thinener

Tsüklai/February 17, 2025 (Agencies): 5buba Khelo India Winter Games, tanabuba leg koba Honibarnü tenzüktsü liasü, iba asayamung ya rür peria malaba ajanga thinenogo.

Tsüngsang mongpu tajungba akümba aser inyakyimtem ajak asadangba sülen anogo tasen sangdongtsü.

J&K Sports Council-i iba osang ya Hombarnü lemsatöp laisü. "5buba Khelo India Winter Games koba February 22 nungi 25 tashi asayatsü liasü, iba ya rür peria malaba ajanga thinenogo. Rür peria alaba sülen inyakyim asadangtsü aser anogo sangdongtsü," ta Council-i X nung zülutsü.

Taküm agi küm anabuba rür peria malaba ajanga iba asayamung thionentsüsa kümogo. Taoba küm iba asayamung ya January ita asayatsü aliba February ita asaya liasü.

Khelo India Winter Games (KIWG) 2025 mezüngbuba leg Leh nung January 23 nungi 27 tashi asayaogo, kong ice hockey aser ice skating amala asayatem asaya-a liasü.

Gulmarg nung alpine skiing, nordic skiing, ski mountaineering, aser snowboarding densema snow events tem ayongzüka asayatsü liasü.

Mezüngbuba leg nung Ladakh-i gold medal pezü

densema medal tenet angu aser parnok sülen tanabuba jenjang nung Tamil Nadu (gold asem densema medal pongu) liasü. Iba asayamung nung Maharashtra-i medal (10) timba angu saka gold ana dang ngua parnok tasembuba nung tembanga liasü. KIWG 2024 nungbo Maharashtra-i gold trok densema skating medals 20 ngua parnok temaba jenjang nung tembanga liasü. KIWG 2025 nung Telangana (2 gold) pezübuba aser Karnataka (1 gold) pongububa nung tembangogo.

Khelo India Winter Games ya 2020 küm tenzük. Tetsür 306 densema asayar 1000 shi mezüngbuba asayamung nung shilem agia liasü. Kümtem tsüngda asayartem taliba küm odar. 2021 küm asayar 1350 dak tema aser 2022 küm asayar 1500 dak temai shilem agi aser iba ajanga J&K nung iba asaya renloka aoba sayur.

2024 küm KIWG nung asayar 700 dak tema, support staff 141 aser technical officials 113 aser volunteer 250 dak temai shilem agia liasü.

2024 küm mezüngbuba Ministry of Youth Affairs and Sports, Government of India aser Sports Authority of India nati National Sports Federations aser Indian Olympic Association na den longjemmer asayamung technical inyakyimtem achaaayanga liasü.

BILEMDANGANG

"Nai nü shisatsü azüoktsü mangazükra nü shisatsü na mashileni anitsü."